

- प्रधानमंत्री नरेन्द्र मोदी गुजरात रा गांधी नगर मांय वैश्विक नवीकरणीय ऊर्जा निवेशक सम्मेलन अर प्रदर्शनी रो उदघाटन कर्या-कह्या-शून्य कार्बन उत्सर्जन रा लगस खातर भारत प्रतिबद्ध ।
- राज्य मांय काल सूं स्वच्छता ही सेवा अभियान री सरुआत व्हेला-श्रमदान अर सफ़ाई कार्यकम राख्या जावेला ।
- 'राइजिंग राजस्थान' ग्लोबल इन्वेस्टमेंट समिट रा सिलसिला मांय उच्च स्तरीय प्रतिनिधि मण्डल काल सूं संयुक्त अरब अमीरात अर कतर रा दौरा माथे ।
- प्रदेश मांय मंगलवार ने मुख्यमंत्री रोजगार उत्सव राख्यो जावेला- नुवा चयनित युवावां ने नियुक्ति पत्र दिया जावेला ।

000

प्रधानमंत्री नरेन्द्र मोदी पर्यावरण रे मुजब विकास अर शून्य कार्बन उत्सर्जन रो लक्ष्य ताई पूगबा खातर भारत री प्रतिबद्धता दोहराई है । श्री मोदी आज गुजरात रा गांधी नगर मांय वैश्विक नवीकरणीय ऊर्जा निवेशक सम्मेलन अर प्रदर्शनी रो उदघाटन कर्या । प्रधानमंत्री गांधीनगर रा महात्मा मंदिर मांय पी.एम. सूर्यघर मुफ्त बिजली योजना रो लोकार्पण कर्या । श्री मोदी पी.एम. सूर्यघर मुफ्त बिजली योजना रा लाभार्थियां सूं बातचीत करी । प्रधानमंत्री कह्या के विकासशील देश होबा रे बावजूद भारत पेरिस मांय तैय जलवायु नियमां ने तैय टेम सूं नौ बरस पैली ई हासिल कर लियो है । वे कह्या के पी.एम. सूर्यघर मुफ्त बिजली योजना रे साथै, भारत रो हर एक घर बिजली बणावा लाग जावेला । प्रधानमंत्री देश रा 17 शहरां ने सौर शहर रा रूप मांय विकसित करबा री योजना री भी बात करी ।

इण मौके केंद्रीय नवीन अर नवीकरणीय ऊर्जा मंत्री प्रल्हाद जोशी स्वच्छ ऊर्जा हल्का मांय भारत री प्रगति रो जिक कर्यो । वे कह्या के भारत नवीकरणीय ऊर्जा हल्का मांय 86 फीसदी री बढ़ोतरी दर्ज करी है । बतायो जावे है के तीन दिन रा इण कार्यकम मांय 40 ऊं बत्ता सत्र व्हेला । इण मांय 140 देशां रा करीब 10 हजार नुमाइन्दा भाग ले रह्या है । ईण बीच प्रधानमंत्री गांधीनगर रा सेक्टर-एक मेट्रो स्टेशन सूं अहमदाबाद मेट्रो रा दूजा फेर ने झंडी दिखा र आज रवाना कर्या । इण दौरान श्री मोदी मेट्रो मांय यात्रा करबा रे साथै यात्रियां सूं बातचीत भी करी ।

000

स्वच्छता ही सेवा, अभियान 2024 काल सूं सरु व्हेरियो है । 2 अक्टूबर तक चालबा वाळां इण अभियान रो इण बरस रो विषय "स्वभाव स्वच्छता-संस्कार स्वच्छता" राख्यो गयो है । इण रे तैत सार्वजनिक अर पर्यटन री ठौड़ां सार्वजनिक भवन, व्यावसायिक हलका, तालाब, चिड़ियाघर, जंगल अर सार्वजनिक शौचालय समेत केई ठौड़ां माथे श्रमदान अर सामूहिक रूप ऊं बड़ां पैमाना माथे सफ़ाई करी जावेला । देशभर मांय केन्द्र सरकार रा सगळा मंत्रालय अर राज्यां री कानी ऊं इण सिलसिला मांय केई कार्यकम रख र आम लोगां ने शामिल कर्यो जावेला । प्रदेश मांय अभियान री सरुआत उपराष्ट्रपति जगदीप धनखड झुन्झुनू जिला ऊं वर्चुअल रूप ऊं करेला ।

जिला मांय राख्या कार्यकमां मांय नेहरू युवा केन्द्र रा स्वयं सेवक, राष्ट्रीय सेवा योजना अर एनसीसी अर स्काउट गाइड समेत केई संगठन आप री सेवावां देवेला ।

000

भारतीय वायु सेना री सूर्य किरण ऐरोबेटिक टीम आज जैसलमेर मांय हवाई कार्यक्रम राख्यो। कार्यक्रम मांय टीम रा सदस्य आसमान मांय हैरतअंगेज करतब दिखाया। कार्यक्रम रो आयोजन सूर्य किरण टीम रा जागरूकता कार्यक्रम रे तैत राख्यो गयो हो।

000

प्रदेश मांय दिसम्बर मीना मांय होबा जा रह्या 'राइजिंग राजस्थान' ग्लोबल इन्वेस्टमेंट समिट रा सिलसिला मांय उद्योग मंत्री कर्नल राज्यवर्द्धन सिंह राठौड़ री अगुवाई मांय एक उच्च स्तर रो प्रतिनिधि मण्डल काल सूं संयुक्त अरब अमीरात अर कतर रो दौरा करेला। तीन दिन री इण यात्रा रे दौरान दोन्यू देशां रा व्यापारियां ने राइजिंग राजस्थान समिट मांय शामिल होबा खातर न्यौतो दियो जावेला। इण दौरान दुबई अर दोहा मांय अन्तर्राष्ट्रीय इन्वेस्टर्स रोड शो राख्या जावेला अर केई नामी कंपनियां रा नुमाईन्दा सूं बातचीत कर वां ने प्रदेश मांय निवेश खातर कह्यो जावेला। इण दौरान प्रतिनिधि मण्डल कानी ऊं अबू धाबी नेशनल ऑयल कम्पनी, अबू धाबी अर कतर री इन्वेस्टमेंट ऑथोरिटी अर दोन्यू देशां री चैम्बर ऑफ कॉमर्स एण्ड इंडस्ट्री जेडी संस्थावां रे सागे बातचीत करी जावेला। बतायो जावे है कि जयपुर मांय 9 सूं 11 दिसंबर ताई होबा वाळां राइजिंग राजस्थान ग्लोबल इन्वेस्टमेंट समिट सूं पैली इण दोन्यू राज्य सरकारां रा प्रतिनिधि मण्डल देश-दुनिया री केई कंपनियां अर व्यापारियां रे सागे बातचीत कर रह्या है अर प्री-इन्वेस्टमेंट मीट, रोड शो अर निवेश डॉयलॉग जेडी भांत रा कार्यकमां रे जरिये व्यापारियां ने न्यौतो दे रह्या है। इण सिलसिलां मांय मुख्यमंत्री भजन लाल शर्मा री अगुवाई मांय भी लारला हफ्ता एक ऊचां तबका रो प्रतिनिधि मण्डल दक्षिण कोरिया अर जापान रो दौरा कर्यो हो।

000

प्रदेश मांय मंगलवार ने मुख्यमंत्री रोजगार उत्सव राख्यो जावेला। कार्यक्रम मांय केई महकमां मांय हाल ही मांय चयनित लोगां ने नियुक्ति पत्र दिया जावेला। राज्य स्तरीय कार्यक्रम जयपुर मांय व्हेला। इण बरस कार्यक्रम रो नोडल महकमो चिकित्सा अर स्वास्थ्य महकमां ने बणायो गयो है। जिला स्तर माथे भी कार्यक्रम राख्या जावेला। इण दौरान नुवां चयनित कर्मचारियां सूं मुख्यमंत्री भजन लाल शर्मा वर्चुअल माध्यम सूं जुड़ेला। आदिवासी बाहुल्य सलुम्बर जिला मांय जिला स्तरीय कार्यक्रम पंचायत समिति परिसर मांय राख्यो जावेला। सांचौर, झालावाड़ समेत केई जिला मांय होबा वाळा कार्यक्रम मांय नया चुण्या कर्मचारियां सूं मुख्यमंत्री वीडियो कॉन्फेसिंग रे जरिये जुड़ेला।

000

पैगम्बर मोहम्मद साहब रो जन्मदिवस ईद मिलाद-उन-नबी आज प्रदेशभर मांय उछाव रे साथे मनायो जा रह्यो है। इण मौके मिलाद महफिल अर सीरत जळसां राख्या जा रह्या है। इण मांय पैगम्बर मोहम्मद साहब रा जीवन अर वां री शिक्षावां रा बारा मांय बतायो जा रह्यो है। इण मौके मिलाद जुलूस भी कड्या गया। राजधानी जयपुर मांय दोपहर पाछे जुलूस कड्यो गयो जो घाटगेट सूं रवाना व्हेर कर्बला पुग्यो। डीग रा कामा मांय भी आज सुवांरे नमाज अदा कर न्यारी-न्यारी ठौड़ां सूं जुलूस काड्यो गयो। जैसलमेर मांय काड्या गया जुलूस माथे केई संगठनां कानी ऊं फूल बरसा र भाईचारा री मिसाल पेश करी गयी। भीलवाड़ा मांय लोगां मांय इण पर्व रे चालता खासो उछाव देख्यो गयो। चूरु मांय काड्या गया जुलूस मांय देश भक्ति रा नारां रे साथे मोहम्मद साहब ने याद कर्यो गयो। टोंक मांय ईण मौके धन्ना तलाई चौराहा माथे कार्यक्रम राख्या गया अर महफिल-ए-मिलाद सजाई गई।

000

बालोतरा रा जसोल मांय चाल रह्या माता राणी भटियांणी रा सालाना मेळा मांय आज भाद्रपद मास री तेरस ने बड़ी तादाद मांय सिरधालू माता रा भिंदर मांय दर्शन कर्या। म्हाका खबरनवीस रे मुजब भक्ता रा आबा रो सिलसिलो एकम से सरू व्हेर पूनम ताई चालेला।

अठिने बीकानेर ज़िला रा कोडम देसर मांय भैरवनाथ रो तीन दिन रो मेळो आज सूं सरू व्हयो। मिंदर मांय बीकानेर अर आरे-सारे रा ज़िला ऊं हजारो री तादाद मांय सिरधालू बाबा भैरवनाथ री मूर्ति रा दरसण कर मनौती मांगी।

000

प्रदेश मांय इण बरस चोखो म्हे बरसबा सूं पाणी री भरपूर आवक री है। जोधपुर रो जसवंत सागर बांध आज लबालब भरग्यो। 125 बरस पूराणा इण बांध रा सगळा 52 खम्भां माथे चादर चाल री है। टोक रा रा बीसलपुर बांध रा आज भी चार गेट खोल र न्यारो पाणी काड्यो जा रह्यो है। पश्चिमी राजस्थान रा सब ऊं बड़ा जवाई बांध मांय भी पाणी री आवक व्हे री है। सई बांध अर बेड़ा नदी बांध मांय भी पाणी आ रह्यो है। ज़िला रो हेमावास बांध आज बत्तो भर ग्यो। इण बीच मौसम महकमो 18 सितम्बर रे पाछे प्रदेश मांय बारिश रो दौर फैरू सरू होबा रो अंदाजो जतायो है। मेहकमा रे मुजब पूर्वी राजस्थान मांय 18 अर 19 सितम्बर ने कठे-कठे बादळ गरजबा रे साथे मेह बरस सके है। वठिने इण दौरान भरतपुर, जयपुर संभाग मांय कठे-कठे बादळा गरजबा अर बिजळी चमकबा रे साथे भारी मेह बरस सके है। मेहकमो पश्चिमी राजस्थान मांय मौसम सूखो रहबा रो अन्दाजो जतायो है। वठिने शेखावाटी हल्का अर बीकानेर संभाग रा ज़िला मांय कठे-कठे छितरायो मेह बरस सके है।

000